

Na osnovu člana 13. Zakona o principima lokalne samouprave u Federaciji BiH (Službene novine Federacije BiH, broj 49/06) i članova 10. 12. i 25. Statuta Općine Stari Grad Sarajevo (prečišćen tekst) („Službene novine Kantona Sarajevo“, broj 20/13) na 29. sjednici održanoj dana 27. 06. 2019. godine, Općinsko vijeće Općine Stari Grad Sarajevo, donosi:

P R A V I L N I K O STIPENDIRANJU NADARENIH UČENIKA I STUDENATA

I – OPĆE ODREDBE

Član 1.

- (1) Pravilnikom o stipendiranju nadarenih učenika i studenata (u daljem tekstu Pravilnik) utvrđuju se, opće odredbe, pravo i uslovi za ostvarivanje općinske stipendije nadarenih učenika i studenata koji se nalaze na redovnom školovanju u srednjim i visokoškolskim ustanovama, državljani su Bosne i Hercegovine, a imaju prebivalište na području Općine Stari Grad Sarajevo u neprekidnom trajanju od pet godina do dana podnošenja prijave za dodjelu stipendije.

II – PRAVO I USLOVI

Član 2.

- (1) Pravo na stipendiju po ovom Pravilniku imaju nadareni učenici koji se redovno školuju i studenti starosti do 25 godina, koji nisu obnavljali godinu, a koji su u prethodnoj školskoj/akademskoj godini postigli uspjeh u školi odnosno fakultetu/akademiji i to:
- a) učenici srednjih škola sa najmanjom prosječnom ocjenom od 4,80, a učenici prvog razreda srednje škole koji su u devetom razredu stekli prosjek ocjena 4,80.
 - b) redovni studenti fakulteta/akademija koji prvi put upisuju tekuću akademsku godinu na nekoj od visokoškolskih ustanova i pridruženih članica univerziteta sa najmanjom prosječnom ocjenom 9,00, a učenici prve godine fakulteta/akademije koji su u četvrtom razredu srednje škole stekli prosjek ocjena 4,80.
 - c) svi učenici iz tačke a) ovog člana sa prosjekom 5,0 i studenti iz tačke b) sa prosjekom ocjena 9,50 i više ostvaruju pravo na dodjelu stipendije, bez obzira na ukupan broj bodova, prikupljen na osnovu drugih kriterija po ovom Pravilniku.

Član 3.

Općinsko vijeće na prijedlog Općinskog načelnika donosi Plan stipendiranja nadarenih učenika i studenata za tekuću školsku/akademsku godinu, a sve shodno potrebama i raspoloživim finansijskim sredstvima utvrđenim prijedlogom Budžeta za godinu za koju se plan i donosi.

Član 4.

Plan iz člana 3. ovog Pravilnika provodi Općinski načelnik, a isplata stipendija precizira se Ugovorom o stipendiranju.

Član 5.

Stipendije se dodjeljuju za tekuću školsku/akademsku godinu i isplaćuje se 9 mjeseci u kojim se nastava odvija.

Član 6.

Visina mjesečne stipendije za nadarene učenike i studente iznosi:

- a) za učenike srednjih škola - 80,00 KM;
- b) za studente - 120,00 KM;

IV- SREDSTVA

Član 7.

- (1) Stipendije se dodjeljuju za jednu školsku/akademsku godinu i isplaćuju se za 9 mjeseci, u kojima se nastava odvija, a po utvrđenom Planu stipendiranja nadarenih učenika i studenata procentualno raspoređuju i obezbjeđuju u Budžetu Općine Stari Grad.
- (2) Ukupna sredstva potrebna za stipendiranje procentualno se dodjeljuju za:
 - a) redovno školovanje nadarenih učenika u srednjem obrazovanju - **40 %**.
 - b) redovno školovanje nadarenih studenata - **60 %**.
- (3) Ukoliko se iz određenog razloga ne prijavi dovoljan broj kandidata, Komisija zadržava pravo uz saglasnost Općinskog načelnika, da navedena sredstva preusmjeri na ostale kandidate kako bi se planirana sredstva iskoristila.

V- IZBOR KANDIDATA

Član 8.

- (1) Izbor kandidata za stipendiranje vrši se na osnovu kriterija iz člana 13. ovog Pravilnika, a putem prijave na javni poziv.
- (2) Javni poziv raspisuje Općinski načelnik na prijedlog Službe za obrazovanje, kulturu, sport i lokalni razvoj, (u daljem tekstu: Služba).
- (3) Javni poziv se objavljuje u dnevnim novinama, oglasnoj ploči i zvaničnoj web stranici Općine, najkasnije do 31.10. za tekuću školsku/akademsku godinu, a sadrži pravo i uslove koje kandidati moraju ispunjavati, rok za podnošenje prijave, potrebnu dokumentaciju, način podnošenja prigovora i druge potrebne podatke.

VI KOMISIJA

Član 9.

- (1) Komisiju za izbor kandidata - korisnika općinske stipendije posebnim Rješenjem imenuje Općinski načelnik, (u daljem tekstu: Komisija).
- (2) Komisija je sastavljena od pet članova i to dva predstavnika Komisije za obrazovanje, kulturu i kulturno-historijsko naslijeđe Općinskog Vijeća Stari Grad Sarajevo i tri predstavnika Službe za obrazovanje, kulturu, sport i lokalni razvoj.
- (3) Mandat članova komisije traje do okončanja postupka dodjele stipendije za školsku/akademsku godinu.

Član 10.

- (1) Pristigle prijave svih kandidata za stipendije obrađuje Komisija i na osnovu obrađenog materijala donosi i objavljuje preliminarnu rang listu učenika i studenata dobitnika stipendija
- (2) Preliminarna rang lista se objavljuje na Oglasnoj ploči i web stranici Općine Stari Grad.
- (3) Svaki kandidat koji nije ostvario pravo u javnom pozivu mora biti pismeno obaviješten o rezultatima javnog poziva najkasnije u roku od 8 dana od dana objavljivanja Preliminarne rang liste.
- (4) Nezadovoljni učesnik u javnom pozivu može podnijeti prigovor za zaštitu svojih prava Drugostepenoj stručnoj komisiji Općinskog vijeća u roku od 8 dana od prijema obavještenja.
- (5) Odluka Drugostepene komisije Općinskog vijeća je konačna.
- (6) Izbor kandidata vrši Općinski načelnik na osnovu prijedloga Komisije za izbor kandidata - korisnika općinske stipendije, u skladu sa kriterijima utvrđenim ovim Pravilnikom, o čemu informiše Općinsko vijeće.

Član 11.

- (1) Sa izabranim kandidatom zaključuje se ugovor o dodjeli stipendije kojim se regulišu međusobna prava i obaveze učenika/studenta i Općine Stari Grad Sarajevo.
- (2) Ugovor potpisuje učenik/student i Općinski načelnik u ime Općine Stari Grad Sarajevo, a za maloljetne učenike ugovor potpisuje roditelj/staratelj kandidata.

Član 12.

- (1) Pravo Općinskog načelnika je da obustavi isplatu stipendije učeniku/studentu ukoliko:
 - a) napusti redovno školovanje;
 - b) izgubi pravo na dalje školovanje iz neopravdanih razloga;
 - c) se utvrdi da prima stipendiju po istom osnovu.
 - d) promjeni adresu stanovanja
- (2) U slučajevima predviđenim u stavu (1) ovog člana, potpisnik Ugovora o stipendiranju dužan je da vrati sav iznos sredstava najkasnije do kraja tekuće školske/akademske godine za koju je primio stipendiju po osnovu ovog Pravilnika.

VII - KRITERIJI ZA DODJELU STIPENDIJA

Član 13.

- (1) Osnovni kriteriji za dodjelu stipendija je rezultat postignut u učenju u prethodnoj školskoj/akademske godini, dok su dodatna mjerila, koja se utvrđuju na osnovu rezultata postignutih na takmičenjima.

a) Bodovi po osnovu rezultata u učenju:

- Za nadarene učenike viših razreda srednjih škola prosječna ocjena u prethodnoj školskoj godini zaokružena na dvije decimale i pomnožena sa 10 (prosječna ocjena x 10) bodova;
- Za nadarene učenike prvog razreda srednje škole prosječna ocjena u završnom razredu/zadnja četiri razreda osnovne škole zaokružena na dvije decimale i pomnožena sa 9 (prosječna ocjena x 9) bodova;
- Za nadarene studente na prvoj godini prosječna ocjena u četvrtom razredu srednje škole zaokružena na dvije decimale i pomnožena sa 12 (prosječna ocjena x 12);
- Za nadarene studente viših godina fakulteta/akademija prosječna ocjena u prethodnoj godini studija zaokružena na dvije decimale i pomnožena sa 16 (prosječna ocjena x 16) bodova.

b) Dodatni bodovi se utvrđuju na osnovu slijedećih mjerila.

Nivo takmičenja	Bodovi za učešće	Osvojeno mjesto	Bodovi za osvojeno mjesto
Kantonalno	1.	1.	5
		2.	4
		3.	3
Federalno	2.	1.	8
		2.	7
		3.	6
Državno	3.	1.	11
		2.	10
		3.	9
Međunarodno	4.	1.	15
		2.	14
		3.	13

Napomena: osvojeno mjesto isključuje bodove na osnovu učešća.

c) Po osnovu otežanih uvjeta života

- učenik ili student bez jednog roditelja – 7 bodova,
- učenik ili student bez oba roditelja – 12 bodova

Član 14.

(1) Kada prijavljeni kandidati imaju jednak broj bodova, prednost će imati:

- a) Onaj kandidat koji ima više bodova po osnovu rezultata u učenju.
- b) Kandidat iz viših razreda, odnosno godina studija.

VIII PRELAZNE I ZAVRŠNE ODREDBE

Član 15.

- (1) Stupanjem na snagu ovog Pravilnika prestaje da važi Pravilnik o dodjeli stipendija nadarenim učenicima i studentima („Službene novine Kantona Sarajevo“, broj 32/11 i 41/17).
- (2) Ovaj Pravilnik stupa na snagu danom donošenja i isti će biti objavljen u "Službenim novinama Kantona Sarajevo" i Oglasnoj ploči Općine Stari Grad.

Broj: 02-49-257/19
Sarajevo, 7. juli 2019. god

